

Kaffeefahrta-Eikaufstour

Dr Schwiegervaddr von meira propera Nochbere isch an mega-toller Typ. Dem sieht mr seine bald 80 Jahr überhaupt net a. Sei Läba lang hot'r als Bauer hart schaffa miassa, aber deshalb sein Humor no lang net verlor. Seit der da Hof nemme selber omtreibt, reist der en dr Weltgschicht omanander wiea einscht dr Marco Polo ond dr Genscher.

Der kennt sich en Europa besser aus, als die Frau em Reisebüro. En Ungarn hot 'r sich seine Zäh' richta lasa. In Montegrotto hockt 'r em hoiße Schlamm. En Paris guckt 'r näggiche Mädla a.

Des, was er aber am meishta liebt, send Kaffeefahrta. Dia send schee billig ond er isch dr Hahn em Korb bei dene ganze Senioritas. Meischens goht er alloi uf dia Kaffeefahrta, ohne sei Frau. Dia hot do koin Spaß dra. Aber dr Schwiegervaddr von meira Nochbere, der hot saumäßig Spaß dra. Allerdings bloß bis er hoim kommt. Dann steht nämlich die fleischgewordene Spaßbremse in Form seiner Frau vor ihm ond guckt, was 'r wieder mitbrocht hot. Bei dene Kaffeefahrta isch's nämlich so: Wenn



er nix eikaufft, no isch dr Veranstalter sauer, ond wenn er ebbes eikaufft, no isch sei Frau sauer. Jetzt kommt's halt emmer druf a, wie streitluschtig dass 'r isch. A paar Sacha, wie des Sprudelgerät für d' Badwann' oder den Luftfilter für da Staubsauer hot 'r b'halta dirfa. Aber die Doppelmatratz mit Antimilba-Beschichtung und No-Schnarch-Garantie ond die Rheumadecke für da Hond, hot'r wieder z'rück geba missa, sonst wär die Schwiegermutter von meiner Nochbre auszoga. Zom Glück gib'ts do a vierzehtägige Rückgabegarantie. Die Frist hot 'r bei seim Weib scheint's verpasst.

Bis näggschd Woch'

Ihr

Wulf Wager